

Persepsi Masyarakat Tempatan Terhadap Isu Buruh Asing dari Aspek Keselamatan: Kajian Kes di Pulau Pinang

Local Community Perceptions of Foreign Labor Issues from a Security Aspect: A Case Study in Penang

Afira Shafarina Mohamed Shafari

¹Fatin Umaira Muhamad Azian

Program Sains Pembangunan
Pusat Kajian Pembangunan Sosial dan Persekitaran (SEEDS)
Fakulti Sains Sosial dan Kemanusiaan
Universiti Kebangsaan Malaysia (UKM)

Correspondence e-mail: ¹fatin.umaira@ukm.edu.my

ABSTRAK

Dalam meniti arus pemodenan, perkembangan dalam pembangunan amat dititikberatkan dari pelbagai aspek termasuk ekonomi, sosial, politik dan juga persekitaran. Hal ini dikatakan kerana, kepesatan ekonomi yang berlaku ini secara tidak langsung telah meningkatkan peluang pekerjaan, namun keadaan ini telah menyebabkan ramai warga asing berhijrah untuk bekerja bagi memperoleh pendapatan yang lebih lumayan. Peningkatan jumlah pendatang asing tanpa izin (PATI) ke dalam negara Malaysia telah menyebabkan pelbagai masalah timbul dari aspek sosial khususnya aspek keselamatan. Maka, kajian ini dijalankan untuk mengenalpasti persepsi rakyat tempatan terhadap isu warga asing dari aspek keselamatan serta membincangkan tindakan pihak yang terlibat dalam membanteras masalah yang berpunca daripada warga asing. Bagi mencapai objektif kajian ini, pengkaji telah menggunakan kaedah kuantitatif dengan mengedarkan borang soal selidik kepada 150 orang responden yang merupakan penduduk tempatan Pulau Pinang. Hal ini dikatakan kerana, Pulau Pinang sangat sesuai untuk dijadikan sebagai kawasan kajian lebih-lebih lagi apabila ia merupakan antara negeri perindustrian yang banyak menawarkan peluang pekerjaan. Bagi kajian ini, data yang dikumpul dianalisis secara deskriptif dengan menggunakan perisian Statistical Package for The Social Sciences (SPSS). Kajian yang dijalankan ini mendapati bahawa hampir keseluruhan penduduk Pulau Pinang bersetuju bahawa kemasukan warga asing secara berlebihan akan memberi kesan yang negatif kepada keselamatan rakyat. Oleh hal yang demikian, pelbagai pihak perlu berganding bahu dalam membantu meminimumkan masalah yang dihadapi oleh penduduk tempatan mengenai isu warga asing yang mengancam keselamatan mereka.

Kata kunci: keselamatan, buruh asing, persepsi, penduduk tempatan, tindakan

ABSTRACT

In following the trend of modernization, developments in development are emphasized from various aspects including economic, social, political, and the environment. This is said to be because the economic boom that has taken place has indirectly increased job opportunities, but this situation has caused many foreigners to migrate to work in order to earn a more lucrative income. The increase in the number of illegal immigrants (PATI) into Malaysia has caused various problems from the social aspect, especially the security aspect. Therefore, this study was conducted to identify the local people's perception of the issue of foreigners from the security aspect as well as discuss the actions of the parties involved in combating problems caused by foreigners. To achieve the objectives of this study, the researcher has used a quantitative method by distributing questionnaires to 150 respondents who are

residents of Penang. This is said because, Penang is very suitable to be used as a study area especially when it is one of the industrial states that offer many job opportunities. For this study, the data collected was analysed descriptively using the Statistical Package for the Social Sciences (SPSS) software. This study found that almost the entire population of Penang agreed that the excessive influx of foreigners would have a negative impact on the people's safety. Therefore, various parties need to join hands in helping to minimize the problems faced by residents regarding the issue of foreigners who threaten their safety.

Keywords: *security, foreign labour, perception, local population, action*

1. Pengenalan

Seiring dengan kemajuan teknologi yang semakin hari semakin canggih, perkembangan dalam pembangunan tidak seharusnya diabaikan lebih-lebih dari aspek ekonomi yang merupakan tulang utama sesebuah negara. Menurut Morshidi Azizan (2017), globalisasi yang berlaku ini telah mewujudkan sebuah fenomena buruh asing yang telah memberi impak yang berbeza-beza bukan sahaja terhadap pembangunan negara malah turut memberi kesan ke atas kesejahteraan hidup masyarakat di kawasan tersebut. Malaysia yang merupakan negara membangun perlu mengukuhkan ekonomi negara yang menjadi penggerak utama kepada pembangunan negara. Oleh itu kerajaan juga telah melaksanakan beberapa dasar sebagai strategi terhadap pembangunan negara untuk mengukur pertumbuhan ekonomi yang melibatkan pertambahan keluaran barang dan perkhidmatan dan pertambahan infrastruktur. Menurut Mahanum (2021), kepercayaan dan keyakinan terhadap pelaksanaan dasar-dasar kerajaan ini akan dapat membantu memulihkan ekonomi negara. Aspek-aspek ini melibatkan usaha dari pelbagai sektor dan memerlukan tenaga buruh yang mencukupi bagi mewujudkan pembangunan negara yang baik. Antara strategi yang dibentuk oleh kerajaan adalah dengan mengambil tenaga buruh asing untuk memenuhi keperluan tenaga buruh bagi beberapa sektor ekonomi termasuk sektor perladangan di Malaysia (Johari, 2024).

Pekerja asing atau dalam kata lain pekerja yang bukan berasal daripada Malaysia merupakan seseorang yang meninggalkan negaranya untuk berkhidmat di negara lain sebagai seorang pekerja (CH Hassan, 2009). Hal ini disebabkan oleh buruh tempatan kebanyakannya kurang berminat untuk mengisi kekosongan pekerjaan tersebut dan akhirnya terpaksa dipenuhi oleh pekerja buruh asing. Menurut Ainul Asniera (2021), kebanyakan buruh asing ini terdiri daripada rakyat daripada Indonesia, Bangladesh, Nepal dan Myanmar. Kekurangan buruh menyebabkan pengambilan buruh asing di negara-negara sumber seperti yang disenaraikan di atas terpaksa dilaksanakan sehinggakan berlakunya banjir buruh asing di Malaysia ini telah memberi kesan yang mendalam kepada negara dan juga kesejahteraan hidup rakyat tidak kira dari segi ekonomi, sosial mahupun persekitaran.

Walau bagaimanapun, menurut Menteri Sumber Manusia Datuk Seri M Saravanan (2022), pengambilan buruh asing ini perlu diambil kira terlebih dahulu kerana ia boleh mendorong kepada impak negatif kepada negara. Secara umumnya, apabila negara banyak bergantung kepada warga asing maka akan berlakunya lambakan warga asing lebih-lebih lagi jika pengambilan buruh asing tidak dikawal. Hal ini telah menyebabkan penduduk berasa kurang selamat disebabkan oleh lambakan buruh asing yang berlaku ini. Tambahan pula, penduduk tempatan merupakan antara orang yang sering akan berhadapan dengan warga asing dalam pelbagai situasi. Menurut Majlis Keselamatan Negara (2022), dari sudut ekonomi, lambakan warga asing akan menjadi punca kepada peningkatan kadar pengangguran kepada rakyat tempatan, terutamanya apabila majikan gemar mengupah buruh asing berbanding buruh tempatan kerana upah yang dikenakan terhadap buruh asing lebih rendah berbanding buruh tempatan.

Dari aspek sosial iaitu keselamatan, warga asing telah meninggalkan kesan seperti peningkatan kadar jenayah yang mengganggu ketenteraman dan menggugat keselamatan warga tempatan (Qurratul, 2023). Sesetengah warga asing terdiri daripada PATI (Pendatang Asing Tanpa Izin) yang tidak mempunyai permit, menyukarkan mereka untuk mendapatkan sembarang pekerjaan. Hal ini telah mendorong mereka untuk melakukan kegiatan jenayah demi meneruskan kelangsungan hidup. Selain itu, buruh asing juga memberi kesan kepada tahap kesihatan dalam kalangan warga tempatan. Seperti yang diketahui, kebanyakan buruh asing datang dari negara yang mundur dengan tahap kesihatan yang rendah dan kurangnya kawalan terhadap penyakit berjangkit. Oleh itu, potensi penyakit berjangkit dari warga asing untuk merebak kepada warga tempatan juga tinggi jika tiada pengawalan dan penapisan dari pihak berkuasa.

Jelaslah bahawa walaupun kemasukan warga asing dalam pembangunan memberi impak positif kepada pembangunan negara namun impak negatif yang berpunca daripada warga asing ini juga tidak boleh dipandang remeh hanya disebabkan mereka membantu meningkatkan pertumbuhan ekonomi negara. Tambahan pula, jika dilihat melalui aspek sosial buruh asing telah memberi impak yang besar kepada rakyat tempatan dari sudut keselamatan. Oleh itu, kajian ini dijalankan untuk mengenalpasti persepsi masyarakat tempatan terhadap isu warga asing ini.

2. Tinjauan Literatur

2.1 Definisi Warga Asing

Menurut Che Hashim Hassan (2009), warga asing atau sering dikenali sebagai buruh asing di Malaysia merupakan pekerja yang berasal dari luar negara yang datang untuk bekerja di Malaysia bagi tempoh masa tertentu. Hal ini kerana, kemasukan warga asing yang ramai ini disebabkan oleh adanya peluang pekerjaan yang luas di seluruh Malaysia. Selain itu, menurut Kadir (2016), warga asing adalah kehadiran sekelompok manusia dari sesebuah negara ke negara lain untuk tujuan tertentu dan salah satunya adalah untuk mencari pekerjaan. Hal ini dikatakan kerana, kebanyakan warga asing yang masuk ke Malaysia merupakan penduduk dari Indonesia, Filipina, Bangladesh, Vietnam dan juga Myanmar.

Di samping itu, Najla (2015) mengatakan bahawa kedatangan warga asing ini dapat dibahagikan kepada dua kelompok iaitu:

i. ***Pendatang asing yang sah*** - Pendatang asing yang sah merupakan individu yang telah mendapat keizinan dari negara yang ingin didiami berdasarkan Akta dan Peraturan yang telah ditetapkan oleh negara tersebut. Hal ini menunjukkan bahawa, pendatang asing secara sah ini telah mendapat kelulusan dari segi permit dan juga visa untuk masuk ke dalam negara setelah di semak oleh Jabatan Imigresen Malaysia.

ii. ***Pendatang asing tanpa izin (PATI)*** - Pendatang asing tanpa izin atau dalam kata lain PATI ini merupakan individu yang tidak mendapat keizinan daripada pihak berkuasa negara tersebut menyebabkan mereka akan masuk secara senyap-senyap dan haram. Hal ini dikatakan kerana, PATI ini merupakan individu yang masuk dan keluar dari Malaysia dengan menggunakan jalan yang tidak diwartakan tanpa menggunakan pas mahupun permit yang sah.

Selain daripada itu, menurut Jabatan Imigresen Malaysia (2021), PATI bermaksud warga asing yang menyalahi Akta Imigresen seksyen 5,6,8,9 dan 15 atau Peraturan-peraturan Imigresen yang lain. Hal ini dikatakan kerana, PATI merupakan individu yang tinggal di Malaysia tanpa permit yang sah atau yang telah dibatalkan oleh Ketua Pengarah Imigresen.

Hal ini dikatakan bahawa hampir kesemua pendatang asing yang masuk ke dalam negara ini mempunyai matlamat yang sama iaitu untuk mencari pekerjaan menyebabkan mereka cuba masuk ke dalam negara walaupun kemasukan mereka secara sah tidak dibenarkan oleh pihak berkuasa. Oleh hal itu, berlakunya kemasukan warga asing secara haram yang secara tidak langsung akan memberi kesan kepada kawasan tersebut daripada pelbagai aspek khususnya keselamatan.

2.2 Isu Warga Asing

Berdasarkan Maizatul Azian Marjuki (2018), telah menyatakan bahawa Malaysia berusaha untuk terus membangun dimana ianya sangat penting memerlukan pekerja asing dalam pembangunan ekonomi tetapi, Malaysia tidak terlepas daripada isu pendatang asing sepertimana yang terjadi di negeri Sabah sejak tahun 1990 an. Hal ini dikatakan demikian kerana, berpunca daripada desakan keperluan tenaga buruh di Malaysia terutamanya negeri Sabah dimana ianya mendapat perhatian dalam kalangan buruh asing untuk menyertai dalam sektor pembangunan di Sabah.

Menurut Zuhainy Zulfiffli (2021), Pulau Pinang merupakan salah sebuah negeri yang mempunyai kemasukan buruh asing yang ramai sehingga perlu membina asrama di kampung tradisi Teluk Kumbar untuk dijadikan sebagai tempat tinggal bagi hampir 50,000 pekerja asing. Hal ini menunjukkan kerajaan negeri Pulau Pinang lebih mengutamakan pekerjaan kepada kepada warga asing berbanding dengan penduduk tempatan. Ketidakadilan yang berlaku ini telah menyebabkan timbulnya beberapa isu ketidakpuasan hati penduduk tempatan terhadap kerajaan negeri sehingga mereka melakukan mogok di kampung tersebut untuk menghalang pihak kerajaan daripada meneruskan pembinaan projek asrama itu kepada warga asing kerana pembinaan yang bakal dilakukan itu akan menarik lebih ramai pekerja asing untuk menetap di Pulau Pinang. Hal ini akan membawa kemudatan kepada penduduk tempatan di sekitar Pulau Pinang sekiranya kemasukan warga asing di negeri tersebut tidak diatasi.

2.3 Persepsi terhadap Isu Warga Asing

Menurut Nurina Awanis (2019), penduduk tempatan beranggapan bahawa gaji yang ditawarkan oleh majikan dalam sektor pekerjaan 3D (*dirty, dangerous, difficult*) adalah rendah dan tidak setimpal dengan hasil kerja yang dilakukan. Hal ini menyebabkan majikan mula beralih daripada menggunakan tenaga kerja tempatan kepada tenaga warga asing kerana mereka tidak meminta jumlah gaji yang tinggi berbanding dengan penduduk tempatan. Maka, wujudnya jurang perbezaan antara isu menggaji oleh majikan pekerja tempatan dan pekerja asing. Hal ini secara tidak langsung telah meningkatkan bilangan warga asing yang masuk ke dalam negara bagi mengisi kekosongan pekerjaan ada. Keadaan ini telah menyebabkan para majikan terpaksa menggaji pendatang asing bagi menangani kekurangan tenaga buruh tempatan disebabkan oleh masyarakat tempatan berpendapat bahawa pekerjaan yang ingin dilakukan oleh mereka mestilah setaraf dengan tahap pendidikan yang mereka perolehi.

Selain itu, menurut Nor Fazlina (2021), penduduk tempatan beranggapan bahawa majikan lebih gemar untuk memilih pekerja asing berbanding pekerja tempatan atas beberapa faktor seperti gaji yang murah dan kerajinan yang ditunjukkan oleh pekerja asing tersebut. Hal ini demikian kerana, warga asing ini dikatakan tidak mempunyai banyak kerehuan sekiranya disuruh melakukan pelbagai tugas dan tidak meminta gaji yang tinggi jika dibandingkan dengan penduduk tempatan. Sikap pekerja asing ini menyebabkan majikan sanggup menggunakan orang tengah untuk membawa masuk PATI melalui pangkalan haram dan menanggung bayaran denda kemasukan PATI kerana majikan beranggapan bahawa tindakan tersebut sangat berbaloi walaupun dikenakan caj. Namun, penduduk tempatan berpendapat

bahawa kehadiran pekerja asing secara haram ini akan memberi kesan kepada kesejahteraan hidup rakyat dari segi keselamatan khususnya apabila ia melibatkan pendatang asing tanpa izin.

2.4 Aspek Keselamatan

Menurut Za'im Ahmad et.al (2015), keselamatan boleh didefinisikan sebagai ketiadaan ancaman terhadap sebuah kelompok masyarakat di dalam sesebuah negara. Namun, kemasukan pekerja asing secara tidak terkawal ini telah menjadi salah satu isu yang mengancam pelbagai aspek keselamatan di kawasan tersebut. Selain itu, menurut Pusat Ekonomi Digital (2024), keselamatan ini merujuk kepada sentiasa berada dalam keadaan yang selamat iaitu bebas dari sebarang bahaya, risiko, jenayah, gangguan dan pencerobohan yang akan memberi impak kepada kehidupan penduduk tempatan. Tambahan pula, keselamatan yang terjamin amat penting bagi masyarakat khususnya apabila ia melibatkan warga asing agar kejadian yang tidak diingini dapat dielakkan.

2.4.1 Keselamatan diri

Menurut Ridaudin (2023), walaupun kebanjiran pekerja asing ini dapat membantu memenuhi keperluan tenaga buruh di kawasan tersebut, namun timbulnya pelbagai kes jenayah yang berpunca daripada pekerja asing ini sehingga membahayakan keselamatan penduduk tempatan. Hal ini dikatakan kerana, kes-kes jenayah yang berlaku disebabkan oleh perbuatan segelintir pekerja asing itu telah menimbulkan ketakutan dalam diri individu lebih-lebih lagi golongan perempuan yang berjalan atau keluar secara sendirian. Menurut Nafisah Hussin (2018), jenayah pemerdagangan ini telah meningkatkan lagi pengeksploitasian seksual yang secara tidak langsung telah membahayakan keselamatan individu khususnya bagi golongan wanita. Hal ini dikatakan kerana, golongan wanita sering diperdagangkan bagi tujuan tertentu seperti pelacuran, pusat hiburan, rumah urut dan sebagainya. Menurut Majlis Antipemerdagangan Orang dan Anti Penyeludupan Migran (2015), jenayah pemerdagangan manusia dalam pengeksploitasian seksual merupakan isu yang utama dan tertinggi yang berlaku di Malaysia.

JADUAL 1: Bilangan Mangsa pemerdagangan manusia untuk eksploitasi seksual mengikut kumpulan umur dan jantina di Malaysia

KUMPULAN UMUR	JUMLAH			LELAKI			PEREMPUAN		
	2019	2020	2021	2019	2020	2021	2019	2020	2019
Jumlah	55	20	121	-	-	-	55	20	121
18 tahun ke bawah	1	3	10	-	-	-	1	3	10
18 tahun dan ke atas	54	17	111	-	-	-	54	17	111

Sumber: Kementerian Ekonomi, 2022

Di samping itu, menurut Nik Iman (2023), warga asing banyak menggunakan pengangkutan awam yang ada untuk ke sesuatu tempat menyebabkan berlakunya gangguan seksual terhadap golongan wanita yang menaiki pengangkutan awam seperti bas dan juga kereta api. Menurut Jabatan tenaga Kerja Semenanjung Malaysia (2023), jenayah pemerdagangan oleh warga asing telah melanggar Aktar Kerja 1955 dan Larangan Buruh Paksa di bawah pindaan seksyen 90B di mana setiap individu mempunyai hak untuk melakukan

sesuatu pekerjaan dan tidak boleh dipaksa oleh mana-mana pihak termasuk majikan.

2.4.2 Keselamatan kawasan kediaman

Menurut Nurul Hidayah (2024), warga asing yang tidak mempunyai tempat tinggal akan cuba untuk mencero boh rumah-rumah kosong yang ada di sesebuah kawasan kediaman. Hal ini akan membahayakan penduduk tempatan yang tinggal di kawasan tersebut khususnya keluarga yang merupakan jiran bagi rumah yang dicero boh itu. Tambahan pula, sekiranya mereka berani untuk melakukan pencero boh, ini bermakna mereka juga berani untuk melakukan jenayah lain bagi meneruskan kelangsungan hidup dalam negara. Oleh hal yang demikian, kedatangan warga asing ini secara haram dan tidak terkawal ini akan membahayakan kawasan kediaman yang diduduki oleh penduduk tempatan.

2.4.3 Keselamatan kesihatan

Menurut Noranifitri et.al (2023), kedatangan warga asing ini juga turut memberi kesan kepada kesihatan manusia. Menurutnya, kebebasan bergerak oleh warga asing tanpa kawalan majikan akan meningkatkan lagi potensi masalah kesihatan khususnya melalui penyakit berjangkit. Hal ini dikatakan kerana, penyakit berjangkit yang berlaku ini disebabkan oleh pembawaan daripada pekerja asing yang tidak mengambil vaksin seperti tibi, malaria, HIV dan lain-lain. Sistem kawalan yang kurang cekap ini menyebabkan segelintir pekerja asing yang masuk ke dalam negara terlepas daripada pemeriksaan kesihatan.

Menurut Morshidi Azizan (2017), kemasukan warga asing ini akan menyebabkan berlakunya pembinaan rumah setinggan. Hal ini dikatakan kerana, warga asing ini akan mendirikan kawasan perumahan secara haram sebagai tempat untuk mereka tinggal dan mereka ini tinggal secara berpindah-randah mengikut pekerjaan yang mereka perolehi khususnya dalam sektor pembinaan. Tambahan pula, kawasan setinggan yang dibina oleh warga asing ini tidak teratur dan kekurangan kemudahan asas seperti sistem pembuangan sampah mahupun air kumbahan. Perkara ini akan menyebabkan kawasan tersebut tercemar dan ia akan menyebabkan penduduk di sekitar kawasan tersebut berasa tidak selesa dengan bau yang kurang menyenangkan. Pencemaran yang berlaku misalnya seperti pencemaran air disebabkan oleh pembuangan sampah yang tidak sistematik oleh warga asing ini akan menjejaskan tahap kesihatan penduduk tempatan lebih-lebih lagi apabila mereka menggunakan air yang tercemar itu dalam kehidupan seharian.

2.5 Tindakan Pelbagai Pihak dalam Mengatasi Isu Warga Asing

Menurut Noranifitri et.al (2023), usaha yang bersesuaian harus dilakukan pada semua peringkat bagi mengatasi kehadiran pekerja asing yang tidak terkawal di Malaysia ini. Misalnya, pihak kerajaan boleh menghadkan kemasukan pekerja asing dengan memberi sokongan kepada syarikat-syarikat di Malaysia untuk mengutamakan pengambilan pekerja tempatan berbanding pekerja asing. Hal ini akan membantu mengurangkan kemasukan pekerja asing ke dalam negara.

Menurut Zanariah (2020), pengurangan pekerja asing wajar dilakukan, namun pihak majikan perlu memikirkan pendekatan bagi menarik minat penduduk tempatan untuk mengisi kekosongan yang ada. Misalnya, pihak majikan boleh meningkatkan jumlah gaji yang ditawarkan di samping menggunakan teknologi dalam sektor perkilangan. Tawaran gaji yang tinggi serta penggunaan teknologi seperti mesin ini secara tidak langsung akan menarik minat penduduk tempatan untuk mengisi kekosongan yang ditinggalkan oleh pekerja asing. Menurut Sri Ayu (2023), pihak majikan juga boleh mengutamakan tenaga kerja tempatan sebelum

membuka peluang kepada warga asing dengan mengadakan kempen seperti ‘Kempen Ambil Pekerja Lokal’. Melalui kempen ini, kebergantungan majikan terhadap pekerja asing dapat dikurangkan. Sehubungan dengan itu, majikan juga boleh bekerjasama dengan Kementerian Sumber Manusia untuk menawarkan lebih banyak peluang pekerjaan kepada tenaga kerja tempatan. Oleh hal yang demikian, melalui tindakan ini ia dapat mengurangkan kemasukan warga asing ke dalam negara dan menjamin kualiti hidup rakyat.

3. Metodologi

Kaedah kajian merupakan salah satu elemen utama yang perlu ada dalam sesebuah kajian. Tambahan pula, dengan adanya metodologi kajian ini ia dapat membantu dalam memastikan penyelidikan yang dijalankan ini mempunyai kaedah yang sistematik. Menurut Kamus Dewan Edisi Keempat (2017) metodologi membawa maksud sistem yang merangkumi kaedah dan prinsip yang digunakan dalam sesuatu kegiatan atau disiplin. Metodologi kajian menjadikan kajian yang dijalankan lebih bersistematik dan perjalanan kajian lebih terarah dalam mencapai objektif.

3.1 *Tata Cara Pengumpulan Data*

Cara pengumpulan data ialah kaedah yang digunakan oleh penyelidik untuk mengumpul data kajian. Secara umumnya, terdapat tiga jenis teknik pengumpulan data iaitu pemerhatian, temu bual, dan kajian dokumen. Dalam kajian ini penyelidik akan memberi tumpuan kepada cara pengumpulan data untuk penyelidikan kuantitatif iaitu melalui sumber primer dan juga sumber sekunder. Sumber primer merupakan maklumat asas yang diperoleh sendiri oleh pengkaji melalui analisis dokumen dan soal selidik. Bagi kajian ini data dan maklumat dikumpul adalah dengan menggunakan dokumentasi dan borang soal selidik. Sumber sekunder merupakan sumber yang diperoleh daripada pembacaan bahan bertulis yang dicatat di tempat lain. Sumber ini diperoleh daripada kajian-kajian atau penulisan yang telah dilaksanakan oleh seseorang mahupun sesuatu kumpulan tentang sesuatu peristiwa, tokoh-tokoh dan biasanya digunakan oleh pengkaji untuk dijadikan sebagai rujukan,

3.2 *Instrumen Kajian*

Secara umumnya instrumen kajian ialah apa-apa alat, atau cara atau apa-apa kaedah yang digunakan untuk memperolehi dan mengumpul data kajian berdasarkan soalan yang telah ditetapkan oleh pengkaji untuk ditanyakan kepada responden. Instrumen atau alat kajian yang digunakan dalam kajian ini ialah melalui soal selidik.

3.2.1 *Soal selidik*

Soal selidik adalah satu instrumen yang penting di dalam pengumpulan maklumat dan data yang boleh digunakan dalam tinjauan. Borang soal selidik ini mengandungi tiga bahagian iaitu bahagian A, bahagian B dan bahagian C dengan menggunakan skala likert lima seperti yang telah dinyatakan di bahagian instrumen kajian. Soalan-soalan yang ditanya dalam borang soal selidik adalah berkaitan dengan tajuk kajian. Bahagian A merupakan demografi responden untuk melakukan analisis terhadap latar belakang mereka, manakala bahagian B bertujuan untuk mengenalpasti persepsi rakyat tempatan terhadap isu warga asing dari aspek keselamatan dan akhir sekali bahagian C iaitu membincangkan tindakan pihak yang terlibat dalam membanteras masalah yang berpunca daripada warga asing. *Analisis Data*

Kaedah analisis data merupakan kaedah yang tidak asing dalam setiap kajian yang

dilakukan. Dengan kaedah analisis data, hasil sesuatu kajian akan diperolehi. Kaedah ini merupakan satu kaedah untuk mengawal dan mempersembahkan data yang diperolehi oleh pengkaji kepada bentuk yang lebih bermakna. Cara data itu dipersembahkan menunjukkan bahawa pengkaji telah menganalisis data yang diperolehi dengan sistematik dan efisien. Semua data yang diperolehi melalui borang soal selidik, kajian lepas dan buku dikumpul dan dianalisis dengan menggunakan kaedah deskriptif. Data yang dikumpulkan melalui soal selidik dianalisis berdasarkan bilangan responden yang menjawab mengikut Skala Likert. Melalui penganalisan ini pengkaji dapat mengenal pasti persepsi rakyat tempatan terhadap isu warga asing.

3.3 Analisis Deskriptif

Analisis deskriptif adalah bertujuan untuk menjelaskan ciri sesuatu objek, manusia, organisasi atau persekitaran tertentu. Analisis ini cuba memberi gambaran umum berkaitan dengan tajuk kajian dengan menjelaskan soalan tentang orang yang dikaji. Analisis deskriptif boleh dilakukan sama ada kajian itu menggunakan kaedah kualitatif dan kuantitatif. Bagi kajian isu warga asing dalam pembangunan ini, data-data yang berjaya di kumpul dianalisis secara deskriptif dan dipaparkan melalui jadual dan juga graf dalam membincangkan hasil dapatan kajian.

3.3 Kajian Rintis

Pengkaji telah menjalankan kajian rintis dengan menggunakan aplikasi Statistical Package for The Social Sciences (SPSS). Menurut Ayu Rifka (2023), Statistical Package for The Social Sciences (SPSS) adalah sebuah program komputer yang digunakan dalam analisis berbentuk statistik bagi sesebuah kajian. Hal ini dikatakan kerana, SPSS ini biasanya digunakan oleh pengkaji untuk menganalisis data dengan memaparkan keputusan dalam bentuk grafik seperti jadual dan juga graf. Walau bagaimanapun, untuk memastikan kajian tersebut berjaya dilaksanakan dan boleh dipercayai, data yang telah dikumpul tersebut perlu dinilai dengan menggunakan nilai Cronbach Alpha. Hal ini dikatakan demikian kerana, sesebuah kajian itu boleh dipercayai sekiranya nilai Cronbach Alpha menghampiri nilai 1 atau lebih daripada 0.80, namun sekiranya nilai Cronbach Alpha bagi kajian tersebut kurang daripada nilai 0.60 maka kajian ini tidak berjaya dilaksanakan. Bagi kajian ini, nilai Cronbach Alpha yang diperolehi adalah sebanyak 0.931 dan mendapati bahawa nilai yang diperolehi itu adalah positif. Hal ini membuktikan bahawa kajian yang dilakukan ini boleh dipercayai berdasarkan nilai Cronbach Alpha tersebut.

JADUAL 2: Nilai Cronbach Alpha Sumber: Aplikasi SPSS

Cronbach's Alpha	Cronbach's Alpha Based on Standardized Items	N of Items
.931	.934	30

3.4 Kawasan Kajian

Lokasi kajian yang dipilih adalah Pulau Pinang. Kajian ini dilakukan di salah satu daerah utama yang ada di Pulau Pinang ini iaitu Butterworth. Hal ini dikatakan kerana, daerah Butterworth merupakan salah satu daerah yang mencatatkan pelaburan yang tinggi khususnya bagi sektor perindustrian dan perdagangan. Menurut Datuk Seri Zafrul (2023), Butterworth, Pulau Pinang berjaya mencatatkan pelaburan sebanyak RM200 bilion dalam tempoh 15 tahun sejak tahun 2008. Menurutnya lagi, kawasan perindustrian yang menempatkan banyak syarikat multinasional ini juga terletak di kawasan Seberang Perai, Butterworth. Hal ini menyebabkan banyak kemasukan warga asing di kawasan tersebut menyebabkan daerah Butterworth, Pulau Pinang ini sesuai untuk dijadikan sebagai kawasan kajian. Oleh hal yang demikian, isu buruh asing ini dikaji dalam kalangan penduduk tempatan yang menetap di Pulau Pinang

4. Dapatan Dan Perbincangan

4.1 Demografi Responden

Berdasarkan kajian ini seramai 150 orang responden telah dipilih untuk mengisi borang soal selidik bagi kajian ini. Maklumat bagi bahagian A yang diambil untuk menganalisis ciri-ciri responden adalah seperti berikut:

4.1.1 Profil responden

JADUAL 3: Demografi responden

Aspek	Kategori	Bilangan (orang)	Peratusan (%)
Jantina	Lelaki	58	38.7
	Perempuan	92	61.3
Umur	<20 tahun	22	14.7
	21 – 30 tahun	57	38
	31 – 40 tahun	29	19.3
	41 – 50 tahun	31	20.7
	51 – 60 tahun	6	4
	60 tahun ke atas	5	3.3
Bangsa	Melayu	134	89.3
	Cina	6	4.0
	India	10	6.7
Agama	Islam	134	89.3
	Buddha	6	4.0
	Hindu	8	5.3
	Kristian	2	1.3
Pekerjaan	Sektor Awam	46	30.7
	Sektor Swasta	32	21.3
	Bekerja Sendiri	16	10.7
	Pelajar	51	34
	Tidak Bekerja	5	3.3
Status Perkahwinan	Berkahwin	81	54
	Bujang	69	46

Tahap pendidikan	PT3	9	6
	SPM	28	18.7
	STPM/Sijil	15	10
	Diploma	39	26
	Ijazah Sarjana Muda	47	31.3
	Ijazah Sarjana	11	7.3
	Doktor falsafah	1	0.7
Pendapatan	Bawah RM 1000	4	2.7
	RM 1001 – RM 3000	38	25.3
	RM 3001 – RM 5000	32	21.3
	RM 5001 - RM 7000	16	10.7
	RM 7001 - RM 10000	9	6
	RM 10000 ke atas	2	1.3
	Tiada pendapatan	49	32.7

Sumber: Penduduk Pulau Pinang

Berdasarkan jadual di atas, menunjukkan bilangan dan peratusan bagi analisis demografi penduduk tempatan di Pulau Pinang. Aspek jantina mencatatkan seramai 58 orang (38.7%) bagi lelaki dan 92 orang (61.3%) bagi perempuan. Bagi aspek umur pula, peratus yang paling tinggi adalah berumur di antara 21-30 tahun iaitu sebanyak 57 orang (38%), diikuti dengan peringkat umur 41-50 tahun iaitu sebanyak 31 orang (20.7%), manakala peringkat umur paling rendah adalah 60 tahun ke atas iaitu seramai 5 orang (3.3%). Dari aspek bangsa pula, bangsa Melayu mencatatkan seramai 134 orang (89.3%), manakala bangsa Cina dan India masing-masing mencatatkan sebanyak 6 orang (4%) dan 10 orang responden (6.7%). Bagi aspek agama pula, agama Islam mencatatkan jumlah yang sama dengan bangsa Melayu iaitu sebanyak 134 orang (89.3%), manakala bagi agama Buddha ia mencatatkan sebanyak 6 orang (4%), diikuti oleh agama Hindu iaitu 8 orang (5.3%) dan akhir sekali agama Kristian seramai 2 orang responden (1.3%). Seterusnya, bagi pekerjaan seramai 46 orang (30.7%) penduduk tempatan Pulau Pinang bekerja dalam sektor awam dan bagi sektor swasta mencatatkan sebanyak 32 orang (21.3%), manakala aspek pekerjaan yang mencatatkan nilai paling rendah ialah tidak bekerja iaitu seramai 5 orang responden (3.3%). Bagi status perkahwinan, seramai 81 orang (54%) telah berkahwin dan 69 orang responden (46%) masih lagi bujang. Selain itu, tahap pendidikan penduduk tempatan Pulau Pinang yang paling tinggi adalah ijazah sarjana muda iaitu sebanyak 47 orang (31.3%), diikuti dengan diploma iaitu seramai 39 orang (26%), manakala tahap pendidikan yang mencatatkan peratus paling sedikit ialah doktor falsafah iaitu hanya seorang responden (0.7%) sahaja. Akhir sekali, bagi tahap pendapatan, kebanyakan responden bagi kajian ini tidak mempunyai pendapatan iaitu seramai 49 orang (32.7%) kerana majoriti responden bagi kajian ini adalah pelajar. Namun, tahap pendapatan yang kedua tertinggi adalah RM 1001-RM 3000 iaitu seramai 38 orang (25.3%) diikuti dengan tahap pendapatan RM 3001-RM 5000 iaitu seramai 32 orang responden (21.3%).

4.2 Persepsi masyarakat tempatan terhadap isu warga asing dari aspek keselamatan

JADUAL 4: Analisis persepsi penduduk tempatan terhadap isu warga asing dari aspek keselamatan di Pulau Pinang

PENYATAAN	SANGAT TIDAK SETUJU		TIDAK SETUJU		TIDAK PASTI		SETUJU		SANGAT SETUJU	
	BIL	%	BIL	%	BIL	%	BIL	%	BIL	%
KESELAMATAN DIRI										
Isu warga asing menyebabkan penduduk tempatan berasa takut untuk keluar rumah seorang diri.	-	-	14	9.3	22	14.7	71	47.3	43	28.7

Kes jenayah oleh warga asing menyebabkan individu berasa trauma.	1	0.7	2	1.3	21	14	79	52.7	47	31.3
Warga asing yang melakukan kes jenayah seperti meragut, merompak dan membunuh akan mengancam keselamatan individu.	-	-	1	0.7	9	6	65	43.3	75	50
KESELAMATAN KAWASAN KEDIAMAN										
Berlakunya kes pecah rumah oleh warga asing.	-	-	3	2	34	22.7	77	51.3	36	24
Kehadiran pengawal keselamatan warga asing memberi suasana yang kurang selamat.	2	1.3	12	8	32	21.3	69	46	35	23.3
Penempatan yang dibanjiri oleh warga asing memberikan suasana yang kurang selesa kepada penduduk kawasan kediaman tersebut.	-	-	4	2.7	9	6	60	40	77	51.3
KESELAMATAN KESIHATAN										
Warga asing membawa virus penyakit berjangkit.	5	3.3	3	2	28	18.7	58	38.7	56	37.3
Warga asing kebanyakannya berasal dari negara miskin dan mempunyai tahap kesihatan yang rendah.	-	-	3	2	37	24.7	61	40.7	49	32.7
Segelintir warga asing yang memasuki negara tidak melakukan saringan kesihatan.	2	1.3	3	2	21	14	58	38.7	66	44

Sumber: Penduduk Pulau Pinang

Jadual 4 menunjukkan persepsi rakyat tempatan terhadap isu buruh asing dari aspek keselamatan di Pulau Pinang. Berdasarkan jadual di atas, bagi aspek keselamatan diri seramai 79 orang (52.7%) bersetuju dengan pernyataan bahawa kes jenayah oleh warga asing menyebabkan individu berasa trauma, manakala seramai 47 orang (31.3%) sangat bersetuju, 21 orang (14%) tidak pasti, 2 orang (1.3%) tidak setuju dan seorang (0.7) sangat tidak setuju bagi pernyataan tersebut. Hal ini dikatakan kerana, menurut Muhammad Aminnuraliff (2023), jenayah yang dilakukan oleh warga asing ini juga akan menyebabkan individu mengalami trauma dan juga gangguan emosi. Hal ini dikatakan kerana, kejadian jenayah yang berlaku itu akan menyebabkan individu berasa gelisah dan ia akan membawa kepada tekanan yang serius sehingga mencederakan diri sendiri. Tambahan pula, ada juga warga asing yang mengganggu penduduk tempatan sehingga ke tempat kerja atau dalam kata lain “*stalker*”. Hal ini menyebabkan individu berasa takut untuk keluar rumah mahupun pergi ke tempat kerja kerana risau akan diganggu atau dcederakan oleh warga asing tersebut.

Selain itu, seramai 71 orang (47.3%) bersetuju dan 43 orang (28.7%) sangat setuju bahawa isu yang disebabkan oleh warga asing ini akan menyebabkan mereka berasa takut untuk keluar rumah seorang diri. Hal ini demikian kerana, menurut Qurratul Aina (2023), walaupun kebanjiran pekerja asing ini dapat membantu memenuhi keperluan tenaga buruh di kawasan tersebut, namun timbulnya pelbagai kes jenayah yang berpunca daripada pekerja asing ini sehingga membahayakan keselamatan penduduk tempatan. Kes-kes jenayah yang berlaku disebabkan oleh perbuatan segelintir pekerja asing itu telah menimbulkan ketakutan dalam diri individu lebih-lebih lagi golongan perempuan yang berjalan atau keluar secara sendirian. Menurut Zuriatunfadzliah, et.al (2013), kejadian jenayah adalah penyebab utama yang mengundang ketakutan wanita. Hal ini demikian kerana, kerisauan ini boleh diburukkan lagi dengan ciri-ciri persekitaran yang terpencil, sunyi, bersemak samun dan kegelapan pada waktu malam, yang menjadi lokasi persembunyian warga asing untuk melakukan jenayah. Oleh hal yang demikian, penduduk tempatan Pulau Pinang bersetuju bahawa isu warga asing ini akan memberi impak kepada keselamatan diri individu.

Berdasarkan jadual tersebut, bagi aspek keselamatan kawasan kediaman seramai 77 orang (51.3%), sangat bersetuju dan 60 orang (40%) penduduk tempatan bersetuju bahawa penempatan yang dibanjiri oleh warga asing memberikan suasana yang kurang selesa kepada penduduk kawasan kediaman tersebut. Hal ini demikian kerana, kes jenayah yang semakin meningkat disebabkan oleh warga asing ini sedikit sebanyak telah meresahkan penduduk di kawasan tersebut lebih-lebih lagi bagi pasangan yang mempunyai anak. Di samping itu, kawasan kediaman yang dibanjiri warga asing ini juga menyebabkan berlakunya pencemaran. Pencemaran yang sering dilakukan oleh buruh asing adalah pencemaran bunyi dan pembuangan sampah merata-rata di sekitar kawasan perumahan yang secara tidak langsung telah mewujudkan suasana yang kurang selesa. Hal ini demikian kerana, sesetengah buruh asing dengan sesuka hati membuang sampah sehingga menyebabkan sistem perparitan dan longkang tersumbat. Sistem perparitan yang tersumbat ini turut menyebabkan tempat pembiakan nyamuk Aedes dan menimbulkan pencemaran air serta bau yang kritikal (Ng Kah Choon, 2016). Oleh hal itu, wujudnya suasana yang kurang selesa kepada penduduk tempatan yang tinggal di kawasan kediaman tersebut.

Bagi pernyataan berlakunya kes pecah rumah oleh warga asing menunjukkan bahawa seramai 77 orang (51.3%) setuju dan 36 orang (24%) sangat setuju dengan pernyataan diatas. Menurut Kementerian Dalam Negeri (2019), seramai 34 orang warga asing daripada pelbagai negara termasuk Filipina, Thailand, dan Indonesia ditahan disebabkan oleh isu jenayah yang dilakukan oleh mereka pada tahun tersebut. Menurut Mohd Saifoul et.al (2018), kemasukan pendatang asing ini telah meningkatkan kes jenayah di dalam negara dan salah satunya ialah

kes pecah rumah dan kehilangan harta benda. Hal ini telah menjadi satu kebimbangan dalam kalangan masyarakat lebih-lebih lagi apabila kebanyakan warga asing ini bekerja sebagai pengawal keselamatan di kawasan kediaman.

Seterusnya bagi aspek keselamatan kesihatan menunjukkan seramai 5 orang (3.3%) responden sangat tidak setuju, manakala 3 orang responden bersamaan 2% tidak setuju dan

28 orang responden bersamaan 18.7% tidak pasti bahawa kemasukan buruh asing mempengaruhi keselamatan kesihatan masyarakat tempatan seperti penyebaran wabak penyakit.t. Manakala seramai 58 orang (38.7%) bersetuju dan 56 orang (37.3%)

sangat setuju bagi pernyataan tersebut. Hal ini dikatakan demikian kerana, terdapat buruh asing yang membawa wabak penyakit daripada negara asal sepertimana kes yang berlaku pada tahun 2021 iaitu virus Covid-19 yang telah mengancam kesihatan masyarakat. Hal ini telah dibukti dalam mengikut Laporan Statistik Kementerian Kesihatan Malaysia (2022) menyatakan virus ini turut merebak dengan cepat. Misalnya, di Pulau Pinang setakat 28 April 2022 seramai

277.000 orang telah dijangkiti virus ini dengan jumlah kematian 1,983 orang. Hal ini dikatakan demikian kerana, berpunca daripada persekitaran tempat kerja yang kurang sesuai dan ia sering terjadi kepada warga buruh asing kerana mereka kebanyakan mempunyai tempat tinggal yang sempit dengan penghuninya yang ramai. Justeru itu, buruh asing yang bekerja lebih-lebih lagi dalam bidang pembinaan dan perkilangan akan membawa wabak penyakit yang serius bagi masyarakat tempatan.

Bagi pernyataan segelintir warga asing yang memasuki negara tidak melakukan saringan kesihatan menunjukkan bahawa seramai 2 orang responden (1.3%) sangat tidak setuju, 3 orang responden (2%) tidak setuju dan 21 orang (14%) tidak pasti bagi pernyataan ini. Walau bagaimanapun, seramai 66 orang (44%) sangat setuju dan 58 orang responden (38.7%) setuju bahawa ada segelintir warga asing yang masuk ke dalam negara tanpa melakukan saringan kesihatan. Menurut Ketua Pengarah Kesihatan Dr Noor Hisham (2022) berkata, kebanyakan penyakit berjangkit jenis malaria yang dikesan di Pulau Pinang ini berpunca daripada warga asing yang datang dari negara-negara Afrika. Menurut beliau, Pulau Pinang dilaporkan menghadapi masalah urban malaria berikutan dengan kebanjiran warga asing di pelbagai sektor ekonomi tanpa mengetahui status kesihatan mereka disebabkan oleh tidak melakukan saringan kesihatan. Menurut Kementerian Kesihatan Malaysia (2024), Malaria merupakan penyakit berjangkit disebabkan oleh parasit plasmodium. Tambahan pula, ia juga boleh menyebabkan sel darah merah pecah. Hal ini jelas menunjukkan bahawa, kemasukan warga asing terutamanya apabila tidak dilakukan saringan kesihatan secara tidak langsung akan mengancam kesihatan penduduk tempatan sehingga membawa kepada kematian.

Seramai 11 orang responden (7.3%) tidak pasti dengan pernyataan dimana individu seharusnya meningkatkan pengetahuan mereka mengenai isu buruh asing ini, manakala seramai 74 orang (49.3%) setuju dan 65 orang responden (43.3%) sangat bersetuju dengan pernyataan tersebut. Hal ini dikatakan kerana, sekiranya individu mempunyai pengetahuan mengenai isu-isu yang berlaku disebabkan oleh warga asing ini ia secara tidak langsung dapat membantu mereka untuk mengelakkan diri daripada berada dalam situasi yang tidak diingini. Menurut Marhaniza (2021), sekiranya masyarakat dapat meningkatkan pengetahuan mereka mengenai impak kemasukan warga asing ini, ia juga dapat membantu mereka membuat keputusan yang cekap semasa berada dalam situasi yang tegang. Tambahan pula, dengan pengetahuan yang banyak mengenai warga asing ini secara tidak langsung dapat menjauhkan masyarakat daripada dimanipulasi oleh mereka. Oleh itu, ilmu pengetahuan mengenai warga asing perlu diterapkan dalam diri setiap individu.

Selain itu, individu juga perlu sentiasa menjaga keselamatan diri mereka dan memberitahu kepada ahli keluarga sekiranya hendak keluar. Bagi pernyataan ini seramai 55 orang (36.75) bersetuju dan 90 orang responden (60%) sangat bersetuju. Hal ini dikatakan demikian kerana, isu jenayah oleh warga asing ini bukan sahaja melibatkan kes pecah rumah mahupun merompak malah ia juga melibatkan kes pemerdagangan manusia. Menurut Mohd Bakri (2010), pemerdagangan orang

merupakan salah satu aktiviti jenayah yang dapat memperoleh keuntungan dengan sangat pantas dengan keuntungan tahunan mencecah antara 5 hingga 42 billion dolar Amerika. Seperti yang kita sedia maklum, pekerja asing yang datang ke Malaysia ini bertujuan untuk mencari rezeki menyebabkan mereka sanggup melakukan apa sahaja untuk mendapatkan jumlah wang yang banyak walaupun perbuatan yang dilakukan itu merupakan sebuah jenayah. Oleh hal yang demikian, individu khususnya golongan wanita seharusnya memaklumkan kepada ahli keluarga sekiranya hendak keluar agar ahli keluarga tahu dimana mereka berada dan mengambil langkah berjaga-jaga daripada situasi yang tidak diingini.

Bagi tindakan pihak kerajaan iaitu menguatkuasakan undang-undang berkaitan warga asing serta memperketatkan kawalan di sempadan negara menunjukkan bahawa seramai 40 orang responden (26.7%) setuju dan 102 orang responden (68%) sangat setuju dengan pernyataan tersebut. Pihak kerajaan memainkan peranan penting apabila ia melibatkan warga asing yang ingin masuk ke dalam negara. Hal ini demikian kerana, kemasukan warga asing perlu melalui jabatan imigresen dimana ia merupakan salah satu jabatan dibawah pihak kerajaan. Menurut Muhammad Afham (2020), pendatang asing tanpa izin (PATI) beri ancaman kepada negara kerana warga asing yang masuk ke dalam negara terutama yang berstatus pelarian bertindak tanpa mengendahkan undang-undang terutamanya di sempadan negara. Keadaan tersebut perlu diatasi oleh pihak kerajaan dengan melaksanakan pematuhan prosedur operasi standard (SOP) bagi memastikan sempadan negara tidak mudah dibolos oleh mereka dan ia secara tidak langsung akan meningkatkan penguasaan undang-undang negara mengenai kemasukan warga asing.

Pihak kerajaan juga seharusnya membendung kemasukan warga asing secara haram dan memantau kedudukan warga asing yang telah tamat permit. Seramai 49 orang (32.7%) bersetuju dan 96 orang responden (64%) sangat bersetuju bagi pernyataan ini. Menurut Dr Mashitah (2024), isu PATI ini merupakan satu cabaran yang besar bagi semua pihak berkuasa lebih-lebih lagi apabila mereka berjaya meloloskan diri masuk ke dalam negara tanpa permit yang sah melalui laluan 'tikus' yang ada. Kemasukan warga asing tanpa permit ini membolehkan mereka melakukan jenayah secara berleluasa dan hal ini akan mengancam keselamatan masyarakat. Oleh hal itu, bagi mengatasi kemasukan warga asing secara haram tanpa permit, ini kecakapan operasi penguatkuasaan ini perlu ditingkatkan bagi menjamin keselamatan negara dan masyarakat.

Di samping itu, majikan juga memainkan peranan yang penting kerana kemasukan warga asing ini bergantung kepada permintaan majikan. Bagi pernyataan majikan seharusnya mengutamakan penduduk tempatan, terdapat seramai 50 orang responden (33.3%) memilih setuju manakala seramai 95 orang (63.3%) memilih sangat setuju bagi pernyataan tersebut. Seperti yang kita sedia maklum, majikan lebih gemar mengambil warga asing bekerja daripada penduduk tempatan disebabkan oleh majikan boleh membayar upah yang murah jika dibandingkan dengan warga asing. Menurut Timbalan Perdana Menteri Datuk Seri Ahmad Zahid Hamidi (2016), berkata tidak ramai rakyat Malaysia yang ingin bekerja dalam sektor 3D iaitu (*dangerous, difficult* dan *dirty*) jauh berbeza dengan buruh asing yang tidak memilih pekerjaan menyebabkan kebergantungan pihak majikan terhadap warga asing amat tinggi. Namun begitu, pihak majikan perlu memberi peluang kepada rakyat tempatan untuk mengisi kekosongan pekerjaan yang ada dengan menawarkan gaji yang setimpal dengan kerja yang dilakukan dan hal ini secara tidak langsung dapat mengawal

kemasukan buruh asing ke dalam negara. Oleh hal yang demikian, keselamatan rakyat akan terjamin dan membolehkan rakyat bekerja dalam suasana yang aman dan selamat.

Akhir sekali, bagi pernyataan majikan seharusnya bertanggungjawab terhadap buruh asing yang diambil bekerja bagi mengelakkan berlakunya masalah jenayah mencatatkan seramai 58 orang (38.7%) bersetuju dan 92 orang responden (61.3%) sangat bersetuju dengan pernyataan itu. Hal ini dikatakan kerana, ada sesetengah majikan tidak mengambil berat tentang para pekerjaannya terutama warga asing menyebabkan mereka bebas melakukan apa-apa sahaja termasuk mengancam keselamatan penduduk tempatan. Apabila hal ini diketahui oleh pihak berkuasa, para majikan tidak bertanggungjawab dan melepas tangan seolah-olah mereka tidak mengenali warga asing tersebut. Menurut Hafiz Sohaimi (2016), tanpa pemantauan yang baik oleh majikan, pekerja asing mungkin akan terjebak dalam kancap gejala sosial yang akan memudaratkan keselamatan masyarakat. Oleh hal yang demikian, bagi mengatasi masalah ini, majikan seharusnya bertanggungjawab menyediakan kemudahan perumahan bagi memudahkan proses pemantauan pekerja asing sebagai langkah pencegahan daripada berlakunya masalah perburuhan dan masalah sosial yang boleh melanggar undang-undang negara.

5. Rumusan Dan Cadangan

Kedatangan pekerja asing ke dalam negara jika dilihat dari sudut positif ia dapat menampung kekurangan tenaga kerja dalam negara disebabkan oleh sikap masyarakat tempatan yang memilih pekerjaan. Kekosongan tenaga kerja yang diisi oleh warga asing ini secara tidak langsung akan meningkatkan ekonomi negara dari segi pelaburan. Hal ini adalah kerana, kerajaan kekurangan tenaga buruh tempatan bagi mempercepatkan projek pembangunan seperti infrastruktur dan lain-lain, namun sekiranya kemasukan warga asing tidak dikawal akan menyebabkan berlakunya lambakan di samping peluang pekerjaan yang sedikit. Warga asing yang tidak mendapat pekerjaan akan melakukan apa sahaja termasuk jenayah demi meneruskan kelangsungan hidup di negara orang dan secara tidak langsung akan membahayakan keselamatan penduduk tempatan. Kemiskinan dan kegawatan ekonomi yang dialami mereka telah mendorong mereka untuk melakukan jenayah seperti merompak, ancaman pembunuhan, mengedar dadah dan sebagainya. Oleh hal yang demikian, pelbagai pihak seharusnya berganding bahu berusaha menyelesaikan isu warga asing ini bagi menjamin kesejahteraan hidup masyarakat.

Antara cadangan yang boleh dilakukan oleh pihak yang terlibat adalah dengan menyiarkan info mengenai kes jenayah yang berpunca oleh warga asing di pelbagai platform media massa. Hal ini dikatakan kerana, seiring dengan kemajuan teknologi masyarakat lebih gemar menggunakan telefon pintar berbanding membaca akbar. Iklan-iklan yang dipaparkan oleh media sosial ini secara tidak langsung dapat memberi pendedahan kepada penduduk tempatan tentang kesan kemasukan warga asing ke dalam negara. Selain itu, masyarakat dan pihak berkuasa boleh bekerjasama dalam membanteras jenayah yang disebabkan oleh warga asing, misalnya individu atau masyarakat hendaklah melaporkan kepada pihak berkuasa mengenai lokasi jenayah warga asing, maka pihak berkuasa dapat mengambil tindakan secepatnya. Dengan adanya kerjasama ini, ia akan memudahkan pihak berkuasa dalam mengesan lokasi-lokasi yang sering dijadikan lubuk jenayah oleh warga asing. Justeru itu, isu

kebanjiran buruh asing ini akan tetap berlaku dan menjadi sebahagian norma dalam kehidupan masyarakat tempatan di Pulau Pinang, maka, tidak kira peranan kerajaan mahupun masyarakat perlulah saling berganding bahu untuk mengatasi segala masalah dengan adanya jalan penyelesaian yang efisien.

Rujukan

- Che Hashim Hassan. (2009). *Buruh Asing di Malaysia: Trend, Kaedah, Kesan, Masalah Dan Cara Mengatasinya*.
- Datuk Seri M Saravanan. (2022). Ambil Kira Kesan Negatif Sebelum Lulus Kemasukan Pekerja Asing. *BH Online*, 12 Oktober. <https://api.bharian.com.my/rencana/minda-pembaca/2022>
- Farhan E., & Imang, U. (2020). Kesejahteraan Sosial Masyarakat Bandar di Kawasan Perumahan. *Malaysian Journal of Social Sciences and Humanities (MJSSH)*, 4(6): 181–192.
- Hafiz Sohaimi. (2016). Ambil Pekerja Asing: Majikan Harus Bertanggungjawab. *BH Online*, 20 Februari. <https://www.bharian.com.my/berita/nasional/2016/02/126285>
- Kementerian Dalam Negeri. (2019). Penerbitan Statistik <https://www.moha.gov.my/images>
- Kementerian Kesihatan Malaysia. (2022). Kemaskini Negeri COVID-19 di Malaysia 28 APR 2022. <https://covid-19.moh.gov.my/terkini-negeri/2022/04/>
- Mahanum Abdul Aziz dan Hazwan Faisal Mohamad. (2021). Dasar Kerajaan Pulihkan Ekonomi Negara Diyakini. *BH Online*, 31 Januari. <https://www.bharian.com.my/berita/nasional/2021> Majlis Keselamatan Negara.
- (2022). Pendatang Asing Tanpa Izin (Pati): “Sigai Dua Segeragai” Berdasarkan Dasar Keselamatan Negara: Elemen Keselamatan Menyeluruh. *Laman Web Rasmi*, 24 April. <https://www.mkn.gov.my/web/ms/2022/04/24/pendatang-asing-tanpa-izin-pati-muhammad-afham-ramli>
- Muhammad Afham Ramli. (2020). PATI beri Ancaman kepada Negara. *Sinar Harian*, 5 September. <https://www.sinarharian.com.my/article/99740/berita/jenayah/pati-beri-ancaman-kepada-negara>
- Muhammad Aminnuraliff. (2023). Polis Sahkan Motosikal Ditunggang Warga Asing Milik Anggota PDRM. *Sinar Harian*, 12 September. <https://www.sinarharian.com.my/article/278649>
- Mashitah Hamidi. (2024). Perkukuh Penguatkuasaan, Akta Dan Pemantauan Tangani Lambakan Warga Asing. *Bernamea*, 13 Februari. <https://www.bernama.com/bm/bfokus/news>.
- Nor, Noranifitri Md, Harliana Halim, Siti Sarawati Johar, and Nur Azah Razali. (2023). Isu Kemasukan Pekerja Asing Terhadap Kesejahteraan Hidup Masyarakat Malaysia. *Human Sustainability Procedia* 3, no. 2: 11-15.
- Raiham Mohd Sanusi. (2021). Kerajaan Pertingkat Penguatkuasaan Di Sempadan Negara. *Sinar Harian*, 24 Mei. <https://www.sinarharian.com.my/article/140272/berita/nasional/kerajaan>
- Razlan, Muhammad Danial Rifqi, Intan Suria Hamzah, Mohd Rahimi Ramli, and S. H. Triyanto. (2023). Isu Pekerja Asing di Malaysia pada Era COVID-19: Kajian Kes Tahun 2020-2021. *Perspektif Jurnal Sains Sosial dan Kemanusiaan* 15:

38-49.

- Ridauddin Daud. (2023). Program Rekalibrasi Tenaga Kerja Dilanjut hingga Hujung 2023. Astro Awani, 10 Januari. <https://www.astroawani.com/berita-malaysia/>
- Sahdan, Z., Ali, N., dan Idrus, S. (2013). Topophobia Wanita Dan Hubungannya Dengan Kejadian Jenayah di Pantai Dalam, Kuala Lumpur, Malaysia. *Perspektif Jurnal Sains Sosial dan Kemanusiaan*: 5(2), 93-110.
- Sofi, Nik Rofidah Nik Mohd, Sulzakimin Mohamed, Seow Ta Wee, Goh Kai Chen dan Md Asrul Nasid Masrom. (2023). Keberkesanan Penggunaan Garis Panduan Penyediaan Penginapan Pekerja Asing Dalam Sektor Pembinaan. *Research in Management of Technology and Business 4, no. 2*: 337-351.
- Qurratul Aina. (2023). MTUC Desak Kerajaan Siasat Dalang Pemerdagangan Pekerja Asing. Sinar Harian, 27Disember. <https://www.sinarharian.com.my/article/641538/berita/nasional/mtuc-desak-kerajaan-siasat-dalang-pemerdagangan-pekerja-asing>
- Zanariah Abd Mutalib (2020). Penempatan khas: Majikan disaran capai persetujuan bersama pekerja asing. Berita Harian. <https://www.bharian.com.my>
- Za'im Ahmad, Sezali Md Darit, T Kamarudin Ngah, Jamaludin Mustaffa. 2015. Isu dan Masalah Pemandang Asing Tanpa Izin dalam Aspek Keselamatan Awam di Malaysia. *Prosiding Persidangan Antarabangsa Kelestarian Insan*.